

頤
道
堂
詩
選

頤道堂詩選卷十五

錢塘 陳文述 退庵

義莊懷范文正公

先天下而憂後天下而樂我懷范文正立志始蠶粥治國
先齊家敦本首瞻族高曾有規矩昆弟爲手足漸漸及雲
初一分似續水木泝本源罔非親骨肉涼薄等行路賢
者所心蹙苦心設義莊綱紀在條目婚喪必有財養殮必
有穀老幼有等差親疎有籍屬嫠也守節操士也資誦讀
醫藥軫疾病賙卹徧烝獨流傳八百年世守無羸縮卽今
范氏田猶分宋朝祿世德盡如此黃虞應可復 天題褒
高義厚德善風俗富民世不乏所望相陶淑良法殊可師

觀感思雍睦譜族念衰宗懷古彌自勗

始遷祖東園公溪山采芝圖

公生明嘉靖間奉親自越遷杭卜宅西湖隱居不仕慕商山四皓之爲人因以東園自號並繪采芝圖以寄意二百年來絹素零落因屬華亭收琦重摹並題四言六章以溯家聲所自始

薄言采芝南山之陽泉甘土沃聊以徜徉

一章

薄言采芝北

山之陰林溪谷邃于焉沈吟

二章

朝采芝兮以供晨饘高堂

馨膳于世何求

三章

夕采芝兮以娛晚晴杖履逍遙玩此紫

英

四章

芝亦有英蘭亦有芳奕葉載榮子孫其昌

五章

芝光煜

然照見顏色作爲此詩以述祖德

六章

六世祖小源公桃花源卜居圖

公諱寂鏡字小溪又字小源東園公長子生明隆
慶間隱居學道不求聞達桃花源在西溪梅花最淡
處嘗欲移家於此旣以小源自號復爲斯圖同里
梁同書填諱

花源在何處乃在西溪陰溪水行不盡逢此梅花林老梅
三萬樹雪花如海溪草堂在其源面對青山岑花開臥香
雪夢醒聞幽禽可以攜濁酒復此橫素琴何如桃花源想
像羲皇人

五世祖仰渠公臯亭舊隱圖

公諱有道小源公子生明萬厯甲申卒於崇禎辛

已以世亂隱居臯亭山下種桃植蓮以自給葬仁壽山儀徵阮元填諱

種梅亦成溪種桃亦成村落英吹不盡卽是桃花源乾坤正龍戰烽火紛中原何如娛圖史偃息棲蓬門蕭蕭侶猿鶴閑閑適雞豚秋成酒初熟開尊話南軒閉戶談黃虞養素望自尊門外臯亭山澹此青一痕

高祖君美公湖墅躬耕圖

公諱廷錫仰渠公第四子生明萬厯乙未卒於

國朝康熙己卯遭世多故屢卻徵聘率妻子躬耕養親有老萊子之風葬仁壽山婁東彭兆蓀填諱不學陶貞白山中稱宰相不學張功甫南湖稱上將卻聘

事高節躬耕志微尙諸葛臥隆中龐公居漢上西湖山水
佳蒼屏列層嶂龍湧蒼漁謳馬塍閒牧唱一鷺破煙飛湖
天寫清曠

曾祖公襄公石室藏書圖

公諱禹治君美公第三子博覽好古藏書萬卷丹
黃甲乙手自評點今之存者手澤在焉生於明崇
禎戊辰卒於國朝康熙丁巳葬仁壽山華亭姚
椿塤諱

惠施富五車孝緒珍七錄古之賢達人日擁書城讀吾祖
居城東舊家有喬木曝書亦有亭藏書亦有屋丹黃手自
編金石悉著錄百年幾遷移青簡消白醭脈望化神仙猶

餘舊書目 高堂力經營舊觀漸可復畱此古畫圖焚香
奉家塾畱示後子孫有書亟須讀

敬題

先大父帶月荷鋤歸遺照用圖中五字爲韵
先大父諱光陸字丹森一字緒山公襄公第三子
早年奔走四方徧歷燕秦楚豫遊跡所至大吏爭
迎恐後 先大父於經世之務無不通曉析律尤
精而不肯就申韓之聘曰寒士爲飢驅負米不得
已也終日執寸管論名例以自炫何異庖丁屠十
二牛芒刃不頓自詡其刀之善也自有能者吾不
爲晚耽禪悅兼修善果來去湛然至今有靈徵焉
生於康熙辛卯卒於乾隆丁未太倉蕭掄填諱

我祖懷隱德胥次絕塵壚行樂宋邵雍有道漢郭泰吐氣
靄春和發論荅天籟安步以當車風度紆裘帶

迢迢燕山雲皎皎秦關月生平遊歷處負米感明發道心
契雲水世味澹簪笏嘯傲七十年高臥煙霞窟

吾翁肯堂構早歲克負荷令辰侍杖履晏歲話燈火心境
關康莊世途泯坎坷含飴弄諸孫翦髮憶初髻

不寫北山樵不圖西溪漁農家苦力作東臯事犁鋤書中
好明月照見笠影疎細和淵明詩飽飯譚黃虞

孫年近五旬高堂侍萊衣 祖庭惜先逝不得同兒嬉名
場與宦海局促爲人羈故鄉好煙水何日全家歸

高堂壽讌詩

嘉慶丁丑七月十日爲家大人七十生日越二

日卽太夫人同庚悅辰

文述

攝篆崇明將至吳

門稱觴

兩親以海疆赤紫且恐以讌客故戕物

命也貽書諄諄戒勿往勿敢違也廼爲此詩寄呈

竝示弟姪

慈悲不奉佛曠達非求仙實理蹈中庸其道爲聖賢吾

父少讀書家無二頃田弱齡愴失恃抱恨悲終天手足祇

兩人扶持相愛憐吾伯少多疾館舍中道捐

祖庭秉淳

德游歷名山川暮年歸故里耆社恒往還

父行遠負米

潔白笙詩篇令節必歸省朝暮恒膝前七秩又開七含笑

歸九泉依依孺子泣聞者皆泣然待人必誠信處事無周

旋不行不義事不名不義錢拳拳訓孫子如是七十年

吾母樂安君失恃悲早歲外祖諸侯賓關河瘁行李外家居婁東太原之王氏母黨鮮諸昆無從問居阯繼母東陽沈相依在桑梓諸弟與弱妹保抱賴賢姊來歸姑已亡中饋惟姊姒翁也盛名德已及邁年齒晨昏勤定省膳飲奉甘旨膝前四五人一女齒纔毀督課如嚴師焚膏恒繼晷述也幸長成今且抱孫矣季方亦同官母心尤所喜就養來江城團圞若鄉里憶舊話寒宵一燈風雪裏仁厚眾所欽勤儉斯爲美如是七十年拳拳訓孫子

有子凡五人長幼皆早殤我生本居次兩弟相扶將讀書幸有成三樹森琳琅仲弟好才藻奇律鳴歸昌瑤林忽中

菱嘅焉心摧傷孫枝幸茁秀雲路思翱翔季也頗聰俊漢
庭充山郎畫筆工黃筌醫術精青囊三婦率五孫馨膳娛
高堂長孫婦頗賢奕奕錢塘汪重親獲致歡名德齊姬姜
次孫新授室系出琅邪王頃自鄉中來展拜殊矜莊曾孫
汪所出玉貌神揚揚頗解識之無自呼曰吉祥從子及從
孫廣蔭依扶桑女弟適隴西佳耦孟與梁德曜忽先逝結
念縈中腸玉立兩甥女鳴珮和珩璜遠來省起居翦燈話
家常回首故山樹月落煙蒼蒼

今年歲丁丑七月初吉高堂兩華髮同庚屈七秩海內

諸文士各各奮才筆作頌彭宣工摘藻王褒逸蘭陵數蕭

慤鄴下推吳質

甘亭仲瞿樊邨清
如皆爲祝嘏之詞

盤悅麗屏幃珠玉輝蓬

華堂下陳墳篋堂上奏琴瑟康爵祝延年孫曾欣繞邾我方官瀛海歸帆待明發先期貽尺書諄切戒其勿上言儉養廉泉源流懼溢下言慈養壽物命生可乞蓉茭爲被服何必佩與黻蔬筍爲靈藥何必芝與朮管樂志難償禽向願易畢故鄉好湖山中有神仙窟與爾歸去來草堂聽春鳥

曼兄有夢飼于八百鶴草堂畫卷余鐫醉盟三十六
鷗水榭印章匹之戲爲此詩鐫之左方竝以寄曼
君解招羣鶴吾曾狎野鷗三生風月夜一片水雲秋嗟我
浮沈感輸君汗漫遊西湖好煙景何日共歸舟
中秋夜同湘蘭兩姬海上玩月書寄吳門

斜廊銀漢遠華渚碧雲寒又值中秋月還從海上看琴樽
坐宵永兒女憶燈殘好慰高堂意團圓話夜蘭
花爲迎仙供香因禮斗焚開軒弄華月橫海玩秋雲圓隙
窺粧鏡清輝戀畫裙有人同不寐清詠達宵分

夜聞湘姬詠詩聲

芳檻三更月殘燈四壁花越吟吾激楚吳語爾風華宮體
唐長慶元言晉永嘉長吸迴曼睩絕勝奏箏琶
賸稿三千首浮名二十年艷情團扇詠高格寶刀篇金粉
香籤畔琉璃硯匣邊溫磨鴛枕夜何事不成眠
一字一玲瓏鷗波淥水空佛緣靈鳳悟仙跡采鸞工小字
秋陰裏微吟夜雨中然脂共評泊繡虎儷驚鴻

題明西湖女畫師林天素蘆雁畫幅

風起寒潮霜月苦秋雪蕭蕭被江渚
絹素叢殘香粉消展卷疑聞哀雁語
若有人兮山之阿
綈絨袿兮被女蘿汀洲香草紉雜佩
武夷秀色明修蛾西子湖頭卜居處
金碧林巒好煙樹曹家橋畔玉簫聲
蘇娘門外香車路錦字南樓斷雁飛
鏡中紅淚欲沾衣幔亭仙樂知何處
目斷孤雲入翠微中原況值烽煙起
哀鴻無地棲荒葦聞說江南有稻粱
幾行飛度黃河水處處寒蘆帶雪開
家家菰米臘莓苔飛鳴宿食知無數
寫出荒寒寄八哀君不見舊院才人好
睂黛六朝金粉畱佳話顧媚桃花卞敏
蘭畫家各自矜流派又不見湖山佳處
畫樓橫闌閣當年有盛名殘山賸水

黃皆令斷楮零綃卜篆生謝翺圖裏曾相見

謝彬曾為汪天素寫照

倫堂上還相餞一曲琵琶寫別情平沙定解彈蹤雁

天素錄聞

汪然明餞之春星堂天素彈琵琶為別張遂辰有詩

別有嬋娟翰墨新淒涼蕭寺葬

羅裙他年來訪楊娃墓疎樹寒煙弔暮雲

楊雲友亦湖上女士墓在智果

西寺

寒夜聞雁

定向衡陽峰畔過瀟湘木落水增波誰家旅館銷紅燭幾處寒閨斂翠蛾夜雨尊前同輩少秋風塞上故人多空山寂寞天涯遠百感茫茫奈爾何

哭王仲瞿

月黑天陰雨不止蕭蕭庭宇悲風起江東餘子老王郎

仲瞿

句

奇才竟以奇窮死讀書任俠誇生平王郎少年多盛名
眼中千秋腹萬卷五岳方寸悲填膺五花之馬千金劍槍
法梨花激飛電八十一家兵權謀二十四部史志傳飛燕
白爵邊烽馳票姚車騎大出師往來軍中若劇孟韜鈴龍
虎無人知中年落魄不稱意春官屢下劉蕡第一紙吳公
薦士書世人欲殺真多事贏得狂名四海傳江山花月消
英氣萬金屢散四壁空故鄉何處垂綸地去年聚筆仍歸
來青衫憔悴王孫哀僧寮聽雨客舟臥夢遊還繞黃金臺
骨相權奇空自勁肝肺槎枒久成病消渴文園託酒悲離
騷屈子嗟天問散花灘畔西風寒昭明閣外秋闌珊太白
騎鯨賈賦鵬使我涕淚悲汎瀾君學富於琅嬛武庫之張

華君行篤於載酒起墳之侯芭君文雄於原衛罪言之杜
牧君詩奇於雪車冰柱之劉义君用宜今亦宜古君才能
文復能武巍冠櫺具七尺身破硯殘書一坏土君戚舒雅
謂鐵才絕奇先君溘逝君心悲幽宮待卜虎山麓黃絹未
勒中郎碑病中貽書屬我子願從埋骨青山陲不知此願
幾時遂憐爾絕代同燼施君婦稱娥媯簪毫擅能事鶴市
香魂賦大招丹青畱重人間世君子亦才儁玉立瑛瓊瑤
西華葛帔愴風雪故人誰是劉孝標一棺寂寞今已矣世
間從此無才子君詩入道文通禪思君疑佛疑神仙君序
我詩成絕筆君注我書願空結花馬塍西賸一龕煙霞萬
古生顏色

小園池上晚步

露團庭綠明秋樹雨過池紅濕晚花記取小園幽絕處一行征雁幾歸鴉

月林花泊夜坐同竹士玩月作

一角萍開浸碧天小池風定月輪圓秋聲簌簌多成雨夜氣沈沈欲上煙往事迷離尋舊夢中年閱歷味枯禪幾能歸去南屏下高枕聽鐘自在眠

同作

陳基

疎星三五月當天幽館涼生樹影圓池靜露華都化水秋高花氣不成煙酒懷澹宕休辭醉詩境空明可悟禪如此清宵須共惜海天容易對牀眠

送仲舒歸吳門

圍沙散雪兩無端又是圍棋一局殘
歸雁心情同落翼棲鳥蹤跡本闌珊
漸看南浦蒲帆遠多恐西華葛屐寒
我亦瓜期行受代前程依舊路漫漫

將去崇明畱別送者

浮生如飛鴻幾處印殘雪十年五佩綸
坐嘯海天碧舊年至瀛洲風景睠疇昔
梁燕尋舊巢磨牛踏陳跡今年歸吳門
歲月感駒隙羈宦蘇臺樹歸路劉河驛
明發佇晨霞長風送海舶聚散本無定
萍蹤閱潮汐仰視浮雲翔長征厲秋翮
別後寄相思滄波應不隔

病中餞春

鏡中華髮更蕭騷藥碗繩牀共寂寥半世已從愁裏過一
春又向病中銷軟聽梁燕和煙語香惜檐花帶雨飄何日
還山養疴去第三橋外理歸橈

病起書示友人

紅雨飄零綠樹肥一春容易送芳菲醉吟湖海新詩卷夢
繞雲山舊衲衣紫燕呢喃如有約白鷗浩蕩本忘機閒來
便寫歸田賦陶令門前五柳稀

病後移居

營巢新燕語參差又是臯橋賃廡期安石且營高臥地少
陵誰寄草堂費十年宦海嗟浮梗一角家山夢采芝湖上
梅花谿上屋未成歸計鬢先絲

病起讀里中前輩詩各題一律

浙派詩成見逸才疎於落葉冷於苔春兼花月將愁去秋
約湖山入夢來得意西冷新笠屐銷魂南渡舊樓臺六橋
煙雨雙峯雪佳處真宜誦百回

厲太鴻微君
樊榭山房集

江上青山澹客心城東煙樹草堂深隱居僻似陶貞白禪
味妙於支道林翠壁蒼苔多古意玉泉寒澗有清音月泉
詩派分明在花隱南湖好共尋

吳西林處士
臨江鄉人集

鬱律蛟龍嘯鳳皇至今奇氣吐光芒袖中疏草新黃閣天
上文章舊玉堂汲黯對君何慙直賈生憂國太猖狂分明
滿耳聞松吹萬斛秋濤響夜涼

杭堇浦太史
松吹堂集

當年海內說袁絲壇坫風流想見之三竺夢回雲縹緲六

朝入遠翠參差間情寄託花千樹絕世聰明筆一枝誰似

斐東蕭處士樊村有小倉山房詩選本儘刪俗體見真詩袁簡齋大令小倉山房集

武林文獻有高名詩格蒼然見老成湖上看雲多逸致月

中橫遂有秋聲心盟白水歌招隱老臥青山託耦耕一卷

杜陵詩律細怡園亭榭話生平朱青湖徵君抱山堂集

梅村老去樹棲鴉祭酒新詩更一家獨抱冬心對冰雪最

宜仙骨臥煙霞徐摛宮體書金管束皙笙詩譜白華何處

風流邀勝賞西泠明月廣陵花吳穀人祭酒有正味齋集

詩中有畫畫中詩清絕湖山筆一枝傲骨本同梅偃塞嬾

懷更比鶴離離白蘋花冷秋陰暮黃葉聲疎暮雨遲一樣

西泠擅三絕松壺居士謂錢君叔美是吾師奚鐵生處士冬花齋集

蘭亭詩好以書傳誰識頻羅有外編古意澹如雲在水高
懷靜比月當天江珧俊得閒中味嶺桂香參悟後禪太息
生平感知已葛林

葛林園學士別業

何處問真詮

梁山舟學士頻羅庵集

宋宣和巫峯硯山石歌

鍾隱羅幬闕淡殿海嶽硯山吾未見誰將北宋傲南唐吹
墮巫山雲一片嗚呼宣和之始何繁華萬舟挽盡江南花
艮岳樓臺出天半靈簫玉貌嬌仙媧石兮定應伴宸翰寫
成鸚鵡兼枇杷含毫倘誦神女賦陽臺雲雨春無涯宣和
之繼何寥落紅羊劫起陣雲惡戰鼓宵驚通德門烽煙夜
照華陽閣白溝紅杏最傷心目斷崑雲好巖壑金源仙島
起瓊華椒崖丁嶂還如昨石兮曾否到冰天玉魚金盃同

飄泊宣和以後九荒宴南渡江山起宮殿至尊幾暇覽書
林待詔恩深開畫院蘭亭帖斷葬青瑤梅花碑冷埋金鈿
石今何處伴宮庭劉娘鈿匣楊娃扇生平未泛瀟湘舟十
年思作瀟湘遊除卻巫山不成夢美人峯下停雲秋塞上
慶雲曾弔古回首錢塘趙家土橫河橋畔玉玲瓏一痕青
滴苔花雨

寓婁東朱陵道院是陸道威先生舊宅

綠樹城西石路斜餘紅猶放短籬花當年元晏先生宅今
日朱陵道士家水竹荒園閒飼鶴滄桑舊國感啼鴉我來
慙向桴亭坐不賦炊梁賦夢華

聽秋舫池上燕坐

新漲通橋綠抱檻坐臨幽幌覺秋生竹竿嫋嫋皆風意蘆
葉蕭蕭作雨聲林鳥飛鳴朝霧歇水花開落夕陽明我來
欲取塵襟滌更憶西湖澈底清

池上玩月懷樊村

晚涼遲薄暝碧淨夜無煙月上池邊樹雲開水底天魚行
牽藻動鳥夢宿枝圓恰憶漁墩客虛堂應未眠

道人餉園杏

嬰桃纔過攜青龍盧橘行看薦玉盤又向客中增客感恰
逢園杏餉園官單衫顏色人千里側帽風懷感百端莫訝
登筵齟牙齒書生況味本辛酸

水亭消暑乞松壺畫冷泉亭畫卷用樊榭集中題石

田冷泉亭圖倡和韻

虛堂殘暑戀斜暉夢入青山詠翠微
隔水古藤蒼鼠竄繞闌修竹白鷗飛
煙霞拂袖新盟在風雨題襟舊侶稀
欲與猿公尋夙約畫中寫我抱琴歸

題彭秋士詩集

竟作古人語其人高可知百年屯骨相
一卷稱心詩偃蹇古梅格褴褛瘦鶴姿
湖山花月地秋水憺無滋

題汪天潛處士

瑜

五湖卜居圖

五湖作明鏡雙峰如翠鬟
鷗夷一去何時還尙畱遺宅青山間
天潛先生古狷者襟情曠逸志高雅
衡茆不樂居故鄉思來湖上營草堂
千樹梅花萬竿竹竹外湖光影山綠

郁家墳畔好青山卜居宜傍青山麓草堂何事營未成十
年臥病吳王城雲飛水動崖谷暗卷中空覺煙波生我與
君家望衡宇同在武林山畔住崔盧門第朱陳村我之子
婦君嬌女閨中頗解讀父書言君逸事如古初莫釐縹緲
好煙樹是君坐看雲生處人生不學陶通明華陽臥聽松
風鳴猶當去作李太白長嘯青天醉采石胡爲落拓不自
聊叢殘粉本畱生綃四圍山翠白雲合疑有林猿水鶴相
招邀我亦江東羈旅客廩廊弔古苔花碧扁舟倘載芋蘿
人來卜五湖三畝宅

汪絳人參軍

初

蜀道從軍圖絳人天潛子也

詩人例入蜀秀才慣從軍汪生抱仙骨吐氣凌秋雲十載

江東不稱意遠向蠻陬去爲吏郝隆才畧晉參軍阮瑀文
章魏書記維西小醜竊弄兵大府仗節方專征應詹造表
臯草檄短衣匹馬從軍行絕域磨崖績殊歟焚雨蠻煙勞
亦重馬革虛懸報國心虎頭未竟封侯夢劉秩原非曳落
河空畱戰績勒蓬婆畫中玉帳英姿在午夜揮毫盾鼻磨
玉樹芳蘭好風格誰識花間舊詞客橫吹鐵篴和金荃月
華倒影滄江碧

君有滄江虹月詞

曉過鷗隱園水亭

圓紋生華池微波瀟芳渚樹頭下殘滴知是夜來雨卷簾
坐虛窻綠陰妙如許萍開見魚行竹靜聞鳥語曉涼襲衣
袂微馨雜蘭杜坐待月華生佳約訂三五

聽雨

樹影離離正上階，忽聞急雨灑庭槐。
催歸庭院雙飛燕，響答池塘兩部蛙。
田父辛勤愁雨雹，詔書鄭重警風霾。
病軀衰朽慙無補，硯匣茶甌坐小齋。

哭蕭樊村

舒雅旣云逝，王褒亦告殂。
故人祇蕭慙，蹤跡如聯舻。
憶昔識君處，湓口春江隅。
君行篤會閔，君理宗程朱。
君學沂服鄭，君文師韓蘇。
君志勵金石，君品珍璠璣。
君材美楨榦，君望重顧廚。
宜置廊廟間，前席陳訐謨。
奈何困一衿，負輓悲鹽車。
與我初締交，篤志慕孔蘧。
論古必宗經，立志期爲儒。
有時論鑿枘，斷斷相齟齬。
有時契意匠，醴醢味醍醐。
我

翁最敬君以君爲儲胥風雨思故人燈火話敝廬醇酒肺
腑融藥石肝膈舒一日不見君杖履窺庭除我子久師君
以君爲楷模筆硯侍函丈几席親居諸崇論最道德高座
談黃虞大義闡忠孝小學箋蟲魚經師與人師至教相涵
濡餘事作詩人高格追黃初一卷樊村集陶謝相馳驅見
我碧城詩頗覺元規污範我示正鵠導我遵康衢如是十
餘載始覺德不孤至今頤道編與君相步趨君兄美文藻
張陸矜名譽瓌材惜早逝衰宗嗟苦荼令子才亦好美質
懷瑾瑜豈料玉樹埋與草悲童烏君家樊邨涇門外漁墩
漁有園三四畝有樹八九株齊名彭與楊煙火望衡閭我
昔過君家鷗鷺盟菰蒲春間我臥病憂我形神臞高論抵

七發我起君始愉五月我至婁養病君家居訪我朱陵觀
閒話桴亭桴出拜託細小預兆定有無季夏月未盡封題
遣長鬚餉我水蜜桃芳甘嚙雲腴豈料未三日翩然返蓬
壺中年慘期功神傷涕淚枯執友不數人爾我尤相須可
憐鸞鳳姿短促同螻蛄篋聲感向秀星精弔謝敷雪涕語
吾子爲君校遺書更勒有道碑徵信明區區

同琴南鷗隱園池上玩月

日落樹煙澹月上池水空樓臺與林木蕩漾空明中小軒
若畫舫秋意生簾櫳涼風從西來水月相玲瓏繞樹起棲
鵲傍砌喧陰蟲故人京華歸感舊春城鐘泛泛忘機鷗冥
冥孤飛鴻歸來臥秋帳花影橫牕重

舟夜卽目

近帆孤峭驚棲鶻遠岸微茫拂水螢柔櫓不鳴櫓不閉夜
船無寐數秋星

哀蟲清響答吳歌孤枕無聊遣睡魔涼露欲流天在水水
漠花底見明河

秋夜不寐書寄盛京扈

蹕諸公

碧梧珠露早秋天憶爾簪毫豹尾前河影定隨龍塞遠月
輪應比鳳城圓鼎湖雲氣連三衛輦路秋陰接九邊多恐
和林霜信早夜涼如水不成眠

晚過鷗隱園池上

秋影寫無聊秋陰澹欲銷微波生畫檻墜露憶蘭橈萍葉
綠成岸藕花紅過橋暮雲寥落處來聽雨瀟瀟

水亭玩月

花裏柴門帶月關月華滿地草堂閒行魚三兩曲闌外睡
鶴一雙修竹間半晌浮生涼枕簟十年歸夢舊湖山南屏
松桂西溪雪話到鄉心破旅顏

同琴陽石湖秋泛過楞伽庵小憩期許青士不至

秋山青欲來秋水碧無際一棹過橫塘秋色蒼然至古寺
臨湖潰叢木雜陰翳豈知石磴幽曾邀翠華泣空潭積
水淡蒼壁古苔膩高閣橫朱闌登高覽澄霽暫偷浮生閒
寺門玩蒼翠閒話石湖客一曲此間是新詞白石工笛聲

小紅細舊雨憶丁卯湖山譚逸事歸橈沂夕流新月蛾眉
麗

追和武邱寺清遠道士詩

松陵集皮陸倡和有此題竝爲之序云武邱山有
清遠道士同沈恭子遊武邱寺詩一首其所稱自
殷周而歷秦漢迄於近代抑二千年末以鬼神自
謂顏魯公愛之不暇刻於巖際竝有繼作李太尉
衛公又次而和之疑爲道家者流抑隱君子今石
刻不見於巖際此詩幸存洵山靈之古蹟也因次
其韵竝錄原作

懷古虞夏後殷周及秦漢上下二千年簡竹蠹魚竄偶誦

隱者作毋乃簡兮玩衍與語恣肆莊列遊汗漫豈有建安
人聃籙同道岸四朝歷興廢百國見治亂捨宅溯典午樓
觀鬱峰半登覽定何年清詞儷中散魯公書摩崖林壑變
昏旦白雲掃蘿壁無復舊詞翰皮陸亦久逝懷古興累歎
何人再鐫勒遊客重褒讚

清遠道士同沈恭子遊武邱寺有作

我本長殷周遭罹歷秦漢四瀆與五岳名山盡出竄及
此寰區中始有近峰玩近峰何鬱鬱平湖渺漲漫吟挽
川之陰步上山之岸山川共澄徹光彩交凌亂白雲翦
欲歸青松忽消半客去川島靜人來山鳥散谷溪中見
日崖幽曉非旦聞子成遊遨風流足詞翰嘉茲好松石

一言常累歎勿謂予鬼神欣君共幽讚

虎邱鴛鴦塚詩

周琳定生詩鈔序云塚在虎邱西麓明季邑人倪士義死將葬其妻楊氏命鐫鴛鴦二字於壙石鄰有勸其改適者遂自剄合葬於此事亦見鈕玉樵觚賸羅浮道士有詩記事云血濺良人墓嬋娟事可傷關閭無此劒紫玉不成香俠烈光吳岳流傳自野王千秋蓮沼上人見紫鴛鴦

鴛鴦塚在何處虎邱山麓山塘路壻曰倪氏曰楊結髮爲夫婦雙飛雙宿如鴛鴦夫先亡婦賁志壙石掩泉臺命工鐫出鴛鴦字鸞不孤翔燕不單棲羈雌憶故雄同穴肯使

初心違虎邱山更西去鴛鴦塚上合歡樹行人不弔真娘墓

重過一榭園感淵如觀察之亡題卷石山房壁

藤胃疎櫺葉滿樓分明華屋已山邱六朝林壑君長往萬
卷圖書我欲愁荒徑鶴孤松影暗虛堂蟲咽桂花秋憑闌
已作西州慟卷石蕭條俯碧流

吳門燈船行

晚波潋灩生微風山塘幾處燈船紅紛若流螢散秋浦繁
若列宿懸高空芙蓉雕舸木蘭檝一道流紋波影接處處
清歌按桺枝家家少婦攜桃葉水底殘紅送夕陽漸看列
炬照明粧迴眸脂暈重重發壓髻繁花冉冉香野曠風高

燈影亂南油北燭更番換船中沉醉治遊人那知絡角斜
銀漢我到吳門十五年初來曾未見燈船噉嘈絲竹繁華
地競渡詩成感暮煙年來漸漸燈船起香囊四角嬌羅綺
但照濃歡不照愁翠翹列坐銀屏裏今歲燈船二十餘蘭
橈桂檻鰲流蘇九華競捧金支樹萬顆爭浮合浦珠君不
見金蓮獨對明溫室天祿校書輝太乙幾人封事爲蒼生
禁鐘宮樹低華月又不見寒儒皓首尙窮經寒女機絲夜
不停辛苦分光乞鄰壁秋風憔悴感閒庭吳兒輕薄真堪
哂甘使田園殉金粉蠟淚銅盤賸幾堆何異黃金擲虛牝
鵲鳥爲媒最不仁玉顏多少委風塵燈船尙是尋常事整
俗觀風或有人

重至琴河書寄梅史宣城

青山紅樹又停雲，繞郭斜陽露遠闌。
父老解談當日事，登臨誰是昔年人。
張融舟畔秋陰重，謝朓樓頭月色新。
寄語宣城舊詞客，雲萍離合總前因。

琴河弔李虎觀司馬有懷湘芷滇南

一棺萬里掩蒿萊，司馬青衫最可哀。
病婦寒衾終歲臥，孤兒素韉幾時回。
滇池月色殘詩卷，吾谷秋聲舊酒杯。
重向虞陽山下過，碧雞天遠望歸來。

余自辛酉至乙丑京師舊作多琴河李晨蘭女士加

墨戊辰九月重涖琴河女士下世已五年矣偶檢
舊稿感而有作用甘亭集中題吳珊珊女士遺墨

韵

采鸞遺事最淒然小字珍珠墨尙鮮
香塚長埋人似玉秋燈重翦夜如年
空餘彩筆題花葉無復朱闌詠柳絲
回首春明成昔夢碧雞門巷畫堂前

題生香館女士遺像

翩然絳節下瑤壇小影亭亭掩曲闌
夜氣化煙殘月墮春陰如雨落花寒
幾番玉版銷香蠹何處青山葬采鸞
我是嬋娟舊書記觚稜重話涕洟漣

詠苔

綠砌侵階總可憐綠陰未許抱琴眠
幾番細雨疎煙後到處幽櫺曲檻邊
芳樹烏啼春徑滑空廊人去唾花圓
舊家

池館都零落腸斷春明十載前

松壺訪我琴河並約同遊虞山適有鹿苑渡海之役

書此奉寄

壑庵招隱有前盟荷鍾西冷約耦耕家近青山松九里夢
畱明月石三生琴河君爲尋秋至鹿苑吾方渡海行迴首
翠微煙樹外晚波涼處碧雲橫

招真治七星檜歌

七星檜乃在虞山之麓鬱羅之臺蕭梁古物僅畱此孤根
瘦骨封莓苔檜兮爾自何年種曾歷孫吳逮劉宋松身鬱
鬱蟠虬龍栢葉森森宿鸞鳳檜兮爾自何方移或者湘東
古苑臺城西雨花天遠法雲散水鶴夜叫蒼猿啼檜兮三

樹何老壽四樹何早凋是否樵斧斫伐野火燒今之在者
是否孫枝旁茁成天喬或偃蹇而臥地亦卓犖而撐霄風
雷霜雪一一各經歷勁骨兀立森孤標嗚呼蕭冢往事悲
陽九選樓人物今無有簡文碑石亦銷磨欲勒高文少名
手予擬重勒簡文帝招真治碑未果夜淡踏月弔南朝耿耿寒星森北斗
林遠峰訪我琴河同登寓樓望虞山慨然興嘆賦此

贈之

一角虞山入晚秋蕭蕭紅葉動人愁夕陽斷鴈橫高堞疎
樹明霞隔畫樓潦倒名場君老驥浮沈宦海我閒鷗客心
同此無聊甚慙對林巒作臥遊

同作

林 鎬

情淡宋玉易悲秋詞賦工言洗馬愁愛看好山爭入郭
每攜吟侶共登樓故人遠似雲中鴈有客閒如海上鷗
無際明霞隔疎樹登臨聊與作清遊

昭明讀書臺下雪後見梅花

蕭梁遺趾贍書臺幾點冰花臥綠苔游騎偶從林外憇高
枝爭向雪中開可宜東閣詩人賞曾見南朝帝子來隔苑
星壇幾株檜簡文碑石更徘徊

花朝琴河官舍書寄管姬湘玉吳門十六韵

溫潤無雙璧嬋媛第一仙瓊花矜艷色碧樹憶芳年蛾影
嬌輕黛鴉雛韞盛鬢丰神詞賦重骨象畫圖傳織錦秦蘓
蕙吹香漢麗娟記營華屋貯解誦碧城篇印以蘭金浣名

將茗玉鐫詩裁靈鳳曲韵寫采鸞牋蠻徼依臣軾龍門侍
史遷長偕花眷屬閒話笑姻緣秋月雲閒樹春帆海上船
畫眉朝鏡裏擁髻夜燈前自泛琴河棹頻虛瑟調絃鄉書
歸鴈近客夢早鶯憐絳縷絲絲結真珠顆顆圓殷勤託蘭
訊一字一纏綿

題岳珂手錄宋高宗賜岳武穆七十六御札卷子

嗚呼趙家南渡中興日武穆精忠推第一若教萬里倚長
城再造河山宜可必豈知和議誤權相忠奸冰炭遭讒嫉
傷心最是兩河戰班師詔下金牌疾頭幘終教投道濟靴
刀惜未抽光弼當年主盟問何人如此藏弓真秘密七十
六札誰所書傳是光堯親御筆機宜何遽不知兵甘心歲

幣稱臣在此卷錄自王孫珂哀痛額天天所卹王之浩氣
配天地王之丹心昭日月孱主虛辭何足珍志士貞臣增
歎息我家咫尺王祠墓瞻禮廟堂神髣髴已看頑鐵鑄奸
回終遣穹碑勒名德一面程史問金陀再拜六篇王著述
程史載武穆著述
六篇又詩詞五首

郊行

一峰青翠認河陽短碣埋香易斷腸滿地蘼蕪煙雨裏更
無人弔十三孃

河陽山有唐陸器
之妾李十三孃墓

鱗鱗春水凍痕消垂柳垂楊送畫橈日晚銅官山下過桃

花一樹謝家橋

破山寺贈性上人用孟浩然香山寺尋湛上人韵

曉行出西郭數里入山翠幽禽導客行余亦尋蹤至一徑
踏松陰數峰隔雲氣澗深臥蟄龍林長迴遠騎層巖蔭石
橋氣象覺幽遂屐齒在蒼苔昨遊如夢寐上人通世法和
光泯同異春淙響雲壑遠鐘動鄰寺拈花供古佛聊證西
來意結願投名山塵纓慨難弃

頂山龍祠題壁

紺樓高壓碧峰環聞道靈湫隱此間霖雨定關天下計風
雷應向夜中還四圍雲氣都成水一路松陰直到山恭值
明禋展春祭相期甘澤潤人寰

過三峰寺用王摩詰過香積寺韻

中峰南下路蒼翠見三峰偶憩澗邊石靜聞雲外鐘禽聲

出修竹人語入溪松中夜聽經者空潭行雨龍

秦坡道中

清響玉琴絃泠泠古澗泉茆亭卧林影松路入潭烟樹老
蒼厓斷苔溪石磴懸湖雲與江雨飛墮翠屏前

喜叔美至竝訂看山之約

好風吹到故人舟卻共看山作雅遊繞郭松陰連雨暗隔
林花氣得春浮便攜筇杖聽鶯燕更約清尊狎鷺鷗莫向
袁江輕放棹相期三月儘勾留

同作

錢杜

琴川煙柳已蕭疎倚棹來尋舊酒壚陶谷我方營北墅
壑庵君又憶西湖壓城嵐翠春雲落出郭鐘聲野寺孤

散步且酬山水興意行不藉短筇扶

三月三日偕叔美子瀟城北紀游

佳晨出城闔勝侶約園綺言循桃源澗不見桃花水崇岡帶複嶺眺望亦云美左挹湖光澄右攬海霞起一聲山寺

鐘飛墮白雲裏閣道問梅花寒香尙餘幾

循桃源澗至維摩寺

海氣釀春寒小樓倚天碧僧定古佛閒吾亦蠟雙屐野燒入空山春禽導行客回首望維摩疎林如不隔同登拂水

巖坐玩劒門石欲認舊題名莓苔淡一尺

由維摩至拂水觀劒門奇石

初經瞿氏墳

瞿忠宣公墓在祖師殿左

漸下蕭家棧其上望海墩其下

烏目澗岡身峭若壁石骨露如鑱直下無畱蹤迅捷若秋

鴈太息與人勞芒屨露雙肝龍藏禮三峰佛煙新柳縮

蕭下

家棧至
三峰

虞山本多松茲地松更勝翠雨瀉林壑碧霞隱巖磴小坐
古潭上濤聲清可聽淨數作畫緣各鼓題詩興前遊迹已
陳後約期重訂歸途入暝煙微風送清磬

由三峯行松徑
中至破山寺

同作

錢 杜

尋幽度長坂茅茨背磧上疑住桃源人花中一雞唱入
林滴殘雨出鵑翫微漲遂到婆娑門逍遙禮龍藏午時
山鐘絕春事正堪訪山溪春不歸寒香尙無恙

下坡逕三折偃蹇扶一簾峭壁壓面來百丈青峻嶒苔
淡挂殘溜丹翠積萬層至今巖竇閒猶結太古冰經聲
落天半定有雲中僧彷彿蘇門游長嘯追孫登

筍輿衝野火小逕入幽邃野色變陰晴花光雜嵐氣海
門斜照來一鳥墮寒翠穿林萬籟寂過嶺辨山寺紺殿
無俗塵古佛有閒意颯颯煎茶聲僧廬得幽憇

出礪松風涼過山松逕長時聞清梵聲一塢松花香客
來定僧起法鼓喧山堂晚飯古潭上萬竹搖清光嶺雲
去不歸遺蛻山中藏寂寥閉青苔野鳥啼禪房依然兩
幢影門外眠斜陽

徐芝仙西藏草檄硯歌

芝仙名蘭常熟人爲某大將軍客從征西藏硯爲
將軍所贈自作銘曰朝繕疏夕草檄墨花怒飛刀
上血青海曲天山頭策勛封汝文成侯嗚呼風霜

着臂十指痛得歸不歸與我其今爲松壺所藏

松壺案頭一方硯乃是琴河徐蘭之所遺蘭也諸侯老賓
客東經東海西西陲衛藏絕域阻聲教將軍專征大出師
軍諮祭酒誰最健蘭也草檄書淋漓將軍功成客子去太
息鳥盡弓藏時一硯流傳在塵世付與松壺老居士碧雞
傳箭佐票姚一樣勛名感遭際

松壺曾佐福大將軍楚南戎幕

蘭也詩名

重尙湖松壺畫筆古今無玉關春色桃花雪好寫唐人出

塞圖

馬後桃花馬前雪芝仙句也

春日雨中書示松壺

料峭輕寒透碧紗春陰如夢客思家一天湖雨生新水二
月山城見落花末路漁樵虛後約故園雲樹隔天涯欄川

畫筆香山詠佛火蒲團證歲華

子蕭以松壺比摩詰余方樂天故云

暑齋牡丹雨中盛開適將移寓書此爲別

無多心事一徘徊曾過虛廊數落梅
桑下敢忘三宿戀花間能得幾回來
蕭蕭庭院蕭蕭竹漠漠池塘漠漠苔
春亦有情如惜別牡丹爭向雨中開

虞山道院西園

木蘭墜露桺絲風石磴高低畫舫通
胡蝶飛來春雨裏杜鵑開向夕陽中
樹環臺榭橫雲碧花壓闌干隔水紅
何似虎邱山下路白公祠宇畫橋東

尙湖晚泛

一曲春塘水千枝野渡花花枝環酒舍
水曲隱漁家林杪

浮新月城陰澹晚霞湖風送歸舫嫋嫋一帆斜

笠耕觀察招飲西園

花壓闌干帶雨紅西園池館敞玲瓏山城樓堞春雲裏水
榭琴尊夜月中話到神倉計西北比來地力竭南東使君
身是江淮使民隱應知達

九重

訪白雲棲精舍坐小石洞露珠泉上

行盡虞山近夕曛一峰蒼翠尙嶙峋巖前綠樹有閒意洞
口白雲如故人澗水碧澄龍入定林花紅墮鳥啼春露珠
泉上聯袂坐各證禪心悟宿因

畱別琴河

此行粗了再來緣料理歸帆晚放船啼鴉心情三月後飛
鴻蹤跡十年前添來畫院傳神筆贏得琴河感舊篇回首
吳門定南望虞山青入一痕煙

松壺子寫孟襄陽夜歸鹿門詩意見貽卽用襄陽原
韵題之

漁梁日落暮山昏山花墮澗泉聲喧隔林柔櫓響煙村有
客乘舟歸鹿門月華兩岸明疎樹故山亦有棲遲處滿地
松陰蘿徑淡畫中寫我攜琴去

秋夜醉臥桂葉書堂待月書寄湖上故人

秋在銀河疎樹間虛堂涼夜綠陰環松風欹枕畱殘醉蘿
月窺人夢故山落落实場同輩少茫茫宦海幾人閒分明

五桠先生意欲起開籠放白鵬

吳偏將軍周瑜手植柏歌

闔閭故苑城西陌孫吳舊有將軍宅將軍往矣宅亦空賸
有將軍舊時柏赤壁東風百萬軍艱難百戰定三分喬柯
不入吳宮樹黛色仍留漢代春蟠鬱蛟螭宿鸞鳳顧曲閒
情杳如夢喬家小女紅玉顏應見將軍手親種君不見成
都西郭武侯祠也有霜皮古柏枝一樣英雄各勛業大材
惆悵杜陵詩

己卯秋日含章閣內史生辰余以煙蘿子所作花海
扁舟畫卷爲壽錢君松壺竝爲補寫一幀曹墨琴
夫人爲書花海扁舟第二圖因題一詩於後

交蘆吹雪滿船頭卷裏青山澹早秋
花海有緣偏宦海扁舟何日是歸舟
三生舊夢雲間鶴一笑忘機水上鷗
證取生平偕隱願勝他滿壁畫滄洲

曹生稼山

靖

爲余選詩書此示之

籠壁新篇婉絳紗多君辛苦爲披沙
空山杳杳松纔古涼夜沈沈月始華
好放珍禽畱獨鶴儘刪密葉賸孤花
此中自有神丹在碧落期君漱紫霞

醉中偶作書示友人

風世應詞客中年署醉翁關心花灼灼得意雨濛濛
圓澤三生悟相如四壁空不爲希有鳥甘作可憐蟲

許身空稷契高枕臥羲皇不任劉伶達難容阮籍狂
江山

詩萬首花月醉千場何日遲歸棹西溪舊草堂

金姬曲

金姬者姓李氏金其小字也張士誠據平江姬年
尙幼隨母入宮依士誠母太妃以居讀書通內典
兼明陰陽壬遁之術士誠降元受太尉秩自姬發
之士誠雖據吳會而江陰長興爲明人所扼兵不
得騁會陳友諒約士誠攻金陵姬爲擇日勸出師
當得志士誠畏難許友諒使而卒不行友諒師亦
旋敗姬長有麗色士誠欲納之姬辭不得遂示寂
佛前葬之閶門外西南五里許管家濱至今人呼
金姬墩或稱金雞者訛也士誠之敗也從姬遺言

使二幼子隨姬母出居民間從李姓爲母孫以免
於難後少子舉孝廉欲之京師母禁之不可乃令
之某地問瞽媼媼聞聲批其頰曰而父一生遭種
惟汝乃欲自投虎口耶詢之乃士誠女兄也遂晦
跡以終吳之亡也女子多奇節若潘元紹之七姬
同殉士誠妻劉夫人之齊雲樓闔宮自焚大節昭
然不得以僭竊少之若姬之異才卓行來去湛然
尤巾幗所僅見者歟饒介爲墓志周伯琦書今皆
未見擬爲補之尙未暇也

畫橋斜偃春流曲橋外春山澹蛾綠落花如雨葬傾城尙
有遺墩此埋玉玉人生小最嬋嫣回首張吳割據年越國

白猿知避妾薛家紅綫本疑仙蘇臺花月平江路後宮嫒
嬌紛無數曾伴瑤池阿姥行同向太妃宮裏住元女兵符
下九天觀香高秀鬱嬪賢溯來萬葉盤根遠鐫出雙南小
字妍張王師敗蘭陵日稽首歸朝邀賜秩海上龍衣御酒
來良謀聞自蛾眉出強敵爲鄰勢不支未曾一步過雷池
武昌鼎足真奇計聞道當年勸出師赤龍若奮全師進軍
聲應使金陵震從此旌幢駐上游半壁江山資坐鎮如何
麗色愛嬀姪玉樹瓊花冠後庭有約姮娥同入月相期織
女共驂星豈識騰空舊仙侶託跡紅塵偶延佇真德宣膺
唐代封新羅國女主金真德麗英肯作吳宮御張麗英居金精山吳
見新舊唐書新羅傳曷欲納爲不證靈飛證法華逍遙南海舊爲家修來悅意
妃不從

三生果放下文殊兩手花齊雲樓閣飛灰處久知成敗關
天數畱遺種向人間改姓還隨姬母去細雨蘼蕪孤塚
春仙遺蛻女兒身周書饒志今何在莫誤南唐耿玉真
麗娃鄉張吳隆安公主祠題壁

隆安公主吳王張士誠女左丞潘元紹室也城破
於盤門薪橋自刎殉國

見隆平紀事

元紹亦以詐降爲

明祖戮於金陵

見明興雜記

吳人憐之卽麗娃鄉祀爲

土神明初懼干厲禁祇設公主像書駙馬府張今
則元紹與公主並祀易張爲潘矣余羈宦吳下僑
寓是鄉者十年因徧攷明初稗乘作爲此詩以表

揚貞烈焉

齊雲往事夕陽中一劒嬋娟弔落紅祇爲興亡慟家國不

知成敗論英雄魂歸鶴市吳宮遠花謝鸞衣楚帳空逐鹿記僞

周城破時出銀幣散諸父老焚珍衣於臥龍街有高議何

小校拾其餘燼一爲彩鸞摩雲一爲春花競秀破殉節

人談祔祀七姬貞烈與君同七姬亦元紹妻先城破殉節

香得舊拓本重摹入寶嚴齋帖江左爲詩文者數君簡

百家並刻七姬詠林余謂七姬宜祔公主祠也

琴河畫史畢仲愷爲余寫行君子十二幀極綺羅金

粉之致昔錢松壺爲余作雪鴻小影旣以五言詩之

今畢君此作與松壺並擅其勝因各題七律一章

玉局修書

一曲紅闌掩綺疏兩行華燭艷湘裾可無彩筆驚鸚鵡應

有名香辟蠹魚海外文章蘇學士宮中姓字宋尙書三生

慧業千秋事莫羨蘭臺領石渠

碧城選夢

碧城十二曲闌干一曲闌干一曲寒何處畫堂開綠桂有
人香徑種紅蘭漢宮綽約憐飛燕唐韻聰明憶彩鸞巫峽
雲歸滄月墮賞心容易稱心難

西溪耦耕

一角秦亭隱翠微春山如畫擁柴扉饁來南畝煙銷髻嘯
罷東臯月滿衣花海香生梅萬樹蘆田露下鶴雙飛得閒
更作垂綸友秋雪庵前好釣磯

春山采藥

遊仙同向白雲過雙髻簪花帶女蘿偕隱久思攜德曜安

禪曾記伴維摩四山泉響隨風遠一路松陰帶雨多此是
天台石梁路瓊臺雙闕問如何

龍堆走馬

當年遠過白龍堆
趨雪遙看走馬迴
青塚埋香揮淚去
天山橫黛畫眉來
玉關楊柳人千里
翠帳蒲桃酒一杯
滿地燕支滿天雪
蕭家殘址有粧臺

燕寢凝香

惆悵蘇州刺史腸
春淡燕寢罷焚香
闌干紅亞花千樹
釵鈿香圍玉一行
金碧樓臺閒宋院
綺羅人物艷唐裝
髣髴禪榻年來事
難醒繁華夢一場

雪苑圍爐

雪後園林霽景澄梅花枝上月如冰
秦絃響急悵關桺燕玉香濃艷鏡
菱舊事酸寒陶學士新聲哀怨鄭
中丞何如但作圍爐飲紅上春屏
四壁燈

畫船邀遂

十年畫舫惜題詩又聽春愁笛
一枝感舊何人同向秀聞歌有客
似桓伊曲中楊柳關山怨江上琵琶
白傅詩記取殷勤邀一見月斜樓角
影參差

水榭盟鷗

半生人海感浮漚世外盟心此一鷗
四壁琴尊同作達五湖煙月不知愁
迎來桃葉皆連理采得蓮花亦並頭
一卷桐霞新著錄隔簾唵煞白蘋秋

桐陰飼鶴

碧梧桐館太淡沈滿院蒼苔滿地陰鮮舞最憐雙白鶴知
音難得一青琴空亭放後雲橫渚涼夜歸來月滿林寄語
嬋娟勤護惜爲他瑤海有仙心

花影譚禪

雲歛青冥湛月華修羅玉女證恒沙坐來圓澤三生石散
到文殊兩手花空外天香悟蘼蔔靜中仙樂奏頻迎後身
合是維摩詰迦葉何勞問酒家

琴心悟道

七條弦上卽蓬瀛流水空山見性情彈罷白雲秋欲語聽
來明月夜無聲千秋綠綺悲知已一卷黃庭悟養生不讀

離騷讀莊列琴心三疊道初成